

- प्रधानमंत्री नरेन्द्र मोदी सांसदां सून महिला आरक्षण अधिनियम मांय संशोधन रे मुद्दे माथे एकजुट होणे रो हेलो कर्यो।
- माय भारत बजट क्वेस्ट 2026 रो राज्य स्तरीय जळसो काले जयपुर मांय-मुख्यमंत्री भजनलाल शर्मा विजेता प्रतिभागियां सून संवाद करेला।
- नौसेना रा कमांडरां रो इण बरस पैलो सम्मेलन 14 अप्रैल सून नुवी दिल्ली मांय सरू व्हेला।
- अमरनाथ यात्रा खातिर पंजीकरण 15 अप्रैल सून सरू व्हेला।
- प्रदेश मांय पश्चिमी विक्षोभ रो असर खतम होणे रे पाछे तापमान मांय बधोतरी सून गर्मी रो असर बध्यो।

000

प्रधानमंत्री नरेन्द्र मोदी कह्यो है कि महिला आरक्षण कानून पर सच्ची भावना रे साथै अमल करणे रो बगत आ गयो है। ताकि 2029 सून लोकसभा अर विधानसभा चुनाव महिला आरक्षण रे साथै होवे। लोकसभा अर राज्यसभा मांय सदन रे नेतावां ने लिख्या पाना मांय श्री मोदी सगळा सदस्यां सून महिला आरक्षण कानून मांय संशोधन रा मुद्दा मांय एकजुट होणे री अरज करी है। इण कानून ने नारी शक्ति वंदन अधिनियम रो नाम दियो गयो है। आं संशोधनां ने पारित करणे खातिर संसद रे बजट सत्र री अवधि बधायी गयी है। तीन दिनां रो विशेष सत्र 16 सून 18 अप्रैल ताई चालेला। महिला आरक्षण अधिनियम सून लोकसभा री सीटां री संख्या बध र आठ सौ 16 हो जावेली। इण मांय 273 सीटां महिलावां रे खातर रहवेला। लोकसभा अर राज्य विधान सभावां मांय महिलावां ने 33 फीसदी आरक्षण देणे रो प्रावधान 2023 मांय संविधान संशोधन रे ज़रिए कर्यो गयो हो। इण बीच भाजपा पार्टी रा लोकसभा अर राज्यसभा सदस्यां ने संसद रे इण विशेष सत्र मांय मौजूद रहवण खातिर व्हिप जारी कर्यो है।

प्रदेश मांय भी नारी शक्ति वंदन अधिनियम ने ले र महिलावां मांय खासो उच्छास है। जयपुर मांय भाजपा प्रदेश कार्यालय मांय राखी ज्यी प्रेस वार्ता मांय सांसद मंजू शर्मा कह्यो की ओ अधिनियम महिलाआवां ने सशक्त बणावण रे साथै-साथै वांने नीति निर्माण री मुख्यधारा मांय लावण रो गेलो भी दिखावेला।

000

दूजां जिला मांय भी इण अधिनियम रे लागू होणे सून महिलावां ने मिलण वाळा फायदा रे बारा मांय भाजपा कानी सून प्रेस कॉन्फेस राखी ज्यी।

000

प्रधानमंत्री नरेन्द्र मोदी काले मांय भारत बजट क्वेस्ट 2026 मांय वीडियो संदेश रा माध्यम सून युवावां ने संबोधित करेला। प्रदेश रा युवा भी इण सून जुडेला। राजस्थान इंटरनेशनल सेंटर मांय होवण वाळा राज्य स्तरीय जळसा मांय मुख्यमंत्री भजनलाल शर्मा भी भेळा व्हेला अर विजेता प्रतिभागियां सून बणतल करेला। युवा मामला अर खेल महकमा रा अतिरिक्त मुख्य सचिव प्रवीण गुप्ता बतायो के केन्द्र सरकार री कानी सून इण दिन 'विकसित भारत यूथ डायलॉग' रो फिनाले व्हेला। बणा बतायो की इण होड़ रे खातिर प्रदेश रा 75 हजार सून बत्ती युवावां पंजीकरण करायो है, जिण मांय सून 984 मेधावी प्रतिभागियां रो चुणाव अंतिम चरण खारित व्हयो है।

000

प्रधानमंत्री नरेन्द्र मोदी रा बालोतरा जिला रा पचपदरा मांय 21 अप्रैल ने प्रस्तावित कार्यक्रम ने ले र तैयारियां करी जा री है। संसदीय कार्य मंत्री जोगाराम पटेल ने आज जोधपुर जिले री पंचायत समिति लूणी रा सभागार मांय प्रधानमंत्री री पचपदरा यात्रा मांय विधानसभा खेतर मांय लूणी रे अहलकारां री बैठक ली। संसदीय कार्य मंत्री ने कह्यो की प्रधानमंत्री नरेन्द्र मोदी 21 अप्रैल ने बालोतरा मांय देश रा पहला एचपीसीएल इंटीग्रेटेड रिफाइनरी कम पेट्रोकेमिकल कॉम्प्लेक्स रो शुभारंभ करेला। वणा कह्यो की पचपदरा रिफाइनरी रा माध्यम सूं राजस्थान देश री ऊर्जा सुरक्षा रो मजबूत स्तंभ बणेला। इण सूं प्रदेश रे आर्थिक विकास ने नुवी गति मिलेली। म्हाणा बालोतरा संवाददाता बतायो के प्रधानमंत्री री सभा ने ले र तैयारियां जोरा माथे है।

000

प्रदेश मांय जनगणना 2027 ने ले र तैयारियां जोरा माथे है। इण ने ले र जयपुर मांय आज एक समीक्षा बैठक राखीजी। बैठक मांय जनगणना नोडल अधिकारी भवानी सिंह देथा अर जनगणना कार्य निदेशक बिष्णु चरण मल्लिक वीडियो कॉन्फ्रेंसिंग रे मार्फत सगळा जिला कलेक्टर्स अर जिलां रा न्यारा-न्यारा अहलकारां सूं संवाद कर्यो। श्री मल्लिक सगळा जिलां रे जनगणना 2027 कामां री समीक्षा करी। बैठक मांय जनगणना काम खातिर सगळी तैयारी करणे अर एक मई सूं 15 मई, 2026 ताई बत्ती ऊँ बत्ती स्व-गणना कर्या जावण री कार्ययोजना बणावण खातिर हुकम दिया है।

000

प्रख्यात गायिका अर पद्म विभूषण सूं सम्मानित आशा भोसले रो आज मुंबई मांय 92 साल री उम्र मांय निधन व्हेग्यो। वाणो अंतिम संस्कार काले सिंज्या 4 बज्यां शिवाजी पार्क मांय व्हेला। गायिका री पौत्री जनाई भोसले सोशल मीडिया माथे बतायो के आशा भोसले ने सीने मांय संक्रमण अर कमजोरी रे कारणे काले सिंज्यां मुंबई रे एक सफाखाना मांय भर्ती करायो गयो हो। आशा भोसले रो करियर आठ दशक सूं भी बत्ती रो रह्यो अर वे आप री बहुमुखी प्रतिभा खातिर ख्यात ही। वे जानी-मानी गायिका लता मंगेशकर री छोटी बहन ही। वणे निधन माथे प्रधानमंत्री नरेन्द्र मोदी, रक्षा मंत्री राजनाथ सिंह, राज्यपाल हरिभाऊ बागडे गहरो शोक जतायो है। श्री मोदी सोशल मीडिया पोस्ट मांय कह्यो है की आशा भोसले भारत री सब सूं प्रतिष्ठित बहुमुखी गायिकावां मांय सूं एक ही। राज्यपाल श्री बागडे आप रे शोक संदेश मांय कह्यो की आशा भोसले भारतीय फिल्म संगीत ने नुवी ऊंचाइयां ताई पहुंचायो। वठिने मुख्यमंत्री भजन लाल शर्मा भी आशा भोसले रे निधन माथे गहरो दुःख जताता थकां कह्यो की सात दशकां सूं बत्ती बगत ताई आप री मधुर आवाज सूं भारतीय संगीत ने वैश्विक पहचान दिलावण वाळी आशा ताई रो योगदान सदा याद रहवेला। ध्यानजोग है कि आशा भोसले आप री सात दशकां सूं बत्ती बगत रे लंबे कार्यकाल मांय न्यारी-न्यारी भाषावां मांय साढे बारह हजार सूं बत्ती गीत रिकॉर्ड कर्या। वाणे कानी सूं गाए गए नगमा संगीत प्रेमियां रे दिल मांय सदा जगह बणाया रखेला।

000

नौसेना रा कमांडरां रो इण बरस पैलो सम्मेलन 14 अप्रैल सूं नुवी दिल्ली मांय शुरू व्हे रह्यो है। तीन दिन रे इण सम्मेलन मांय समुद्री हितां री रक्षा, खमता विकास अर नौसेना री प्रचालन स्थिति री समीक्षा करी जावेली। रक्षा मंत्रालय कह्यो की पश्चिम एशिया संघर्ष अर हिंद महासागर खेतर मांय बहुराष्ट्रीय बला री मौजूदगी रे बीच भारत री ऊर्जा सुरक्षा खातिर बेगा ई नौसैनिक तैनाती रे प्रयोजन सूं ओ सम्मेलन खास व्हे ग्यो है। इण सम्मेलन ने 'ऑपरेशन सिंदूर' रे पाछे नौसेना रे प्रचालन, तालमेल अर तकनीक ने दोबारा थापित करणे रे लिहाज सूं खासो महती मान्यो जा रह्यो है।

000

प्रदेश मांय स्थानीय उत्पादां ने पहचाण दिलाणे अर बाजार सूं जोडने रे लगस सूं पंच गौरव योजना रे तैत हर ज़िले सूं उत्पादां री पहचान करी गयी है। इणी कड़ी मांय डीग ज़िले मांय अर्जुन रे पौधे ने मुख्य वनस्पति घोषित कर्यो गयो है। वन महकमा रा सहायक वन संरक्षक सुरेश चौधरी ने बतायो कि अर्जुन रो पेड़ पर्यावरण संरक्षण मांय मददगार होवे है साथै ही इण री छाल औषधीय गुणां सूं भरपूर होवे है।

000

अमरनाथ यात्रा इस साल 3 जुलाई सूं 28 अगस्त तांई चालेली। जम्मू-कश्मीर रा उप-राज्यपाल मनोज सिन्हा सोशल मीडिया पोस्ट मांय बतायो की पहली पूजा ज्येष्ठ पूर्णिमा यानी 29 जून ने व्हेली। इण मांय भगवान शिव री आराधना करी जावे है। तीर्थजातरा खातिर पंजीकरण 15 अप्रैल सूं ऑनलाइन अर ऑफलाइन दोन्यू तरीका सूं व्हेला। पंजीकरण सुविधा देश रे किणी भी जम्मू अर कश्मीर बैंक, पंजाब नेशनल बैंक, स्टेट बैंक ऑफ इंडिया अर यस बैंक समेत 554 बैंक शाखावां मांय मुहैया व्हेला।

000

सीकर जिला रा प्रसिद्ध खाटूश्याम जी मांय नोन वेण्डिंग जोन मांय रेहडी-ठेला या दुकान लगाण वाळा माथे अबै ए.आई. री निज़र रहवेली। ऐडा दुकानदारां रो ए.आई. रे जरिये आपे ई चालान कट जावेला। ज़िला कलेक्टर री अध्यक्षता मांय आज खाटूश्याम जी रा विकास अर व्यवस्थावां ने लेर बैठक राख्यी ज्यी। इण बैठक मांय व्यापार मण्डल, स्थानीय संगठनां अर श्रिद्धालुआं सूं सुझाव मांग्या गया अर वां रे माथे चर्चा करी ज्यी। बैठक मांय महिला श्रिद्धालुआ री सुविधावां ने ले र न्यारा-न्यारा उपायां माथे चर्चा व्ही।

000

प्रदेश मांय पश्चिमी विक्षोभ रो असर खतम होणे रे पाछे तापमान मांय बधोतरी होणे सूं गर्मी रो असर बधण लाग्यो है। मौसम महकमे रे मुजब लारला चौबीस घंटां मांय प्रदेश मांय सब सूं बत्ती 39 दशमलव 6 डिग्री सेल्सियस बत्ती ऊँ बत्ती तापमान बाड़मेर अर कोटा मांय दज कर्यो गयो। वठिने जयपुर, अलवर, सीकर समेत घणकर शहरां मांय तापमान दो सूं पांच डिग्री सेल्सियस तांई बधग्यो। पश्चिमी राजस्थान मांय दिन रे साथे अबै रात रो तापमान भी बधण लाग्यो है। मौसम केन्द्र जयपुर रे मुजब प्रदेश मांय आवता एक सप्ताह मौसम सुखो रहणे रा आसार है। वठिने आगला चार-पांय दिनां मांय कमती अर बत्ती तापमान मांय 3 सूं 5 डिग्री सेल्सियस तांई बधोतरी व्हे सके है।

000

प्रदेशभर मांय मनाया जा रह्या पोषण पखवाडा रे तैत डीग मांय न्यारा-न्यारा कार्यक्रम हो रह्या है। "जीवन के प्रथम छः वर्षों में अधिकतम मस्तिष्क विकास" थीम माथे केई जागरूकता गतिविधियां संचालित करी जा रही है। इण मांय आंगनबाड़ी कार्यकर्ता अर स्थानीय जन भागीदारी सूं जागरूकता रैलियां निकाळी जा रही है। टाबरां रे माता-पिता ने ओ बतायो जा रह्यो है कि जीवन रा पैला छः बरसा मांय चोखो पोषण देणे रे साथे सावचेती सूं देखभाल करी जाणी चाहिजे। आंगनबाड़ी कार्यकर्तावां ने भी गोष्ठियां रा माध्यम सूं टाबरां रे सिखणे अर समग्र विकास री प्रकीया ने समझायो जा रियो है।

000

भारत बरस 2025 मांय एक लाख 43 हजार सूं बत्ती पेटेंट दाखिल कर्या। ओ बरस 2024 री तुलना मांय 30 फीसदी बत्ती है। वाणिज्य अर उद्योग मंत्री पीयूष गोयल सोशल मीडिया पोस्ट मांय कह्यो है की 69 फीसदी सूं बत्ती पेटेंट मांय दाखिल कर्या गया।

000